

A NICOLA MIRAGLIA

*Nu busto 'e bronzo a ccentro d''o salone,
'e n'omme 'mpapijonne e ffaccia austèra;
'sti vierze so' pe' cchi nun sape bbuono
chelloca st'omme ha fatto e cchello ch'era.*

*Era 'o prodotto 'e n'ebbreca passata,
asprigno comm''a terra d''e lucane;
'ncopp' a nu piezz''e marmo sta appujato,
'nzegno 'e ll'affetto 'e nuje napulitane.*

*Nuje ca cient'anne fa rischijeme gruosso,
'e perdere pe' ssempe orgoglio e gloria;
vinte meliune 'a sotto,steve 'n fuosso,
'stu Banco nuosto ricco 'e tanta storia.*

*'Stu Banco addò mappate 'e puverielle,
truvavano sustegne e ddignità,
ca già cient'anne primm''e Masaniello,
sanava 'e cchiaje cchiù ggrosse 'e 'sta città.*

*'nzomma llà nce vuleva nu remmerio,
llà nce vuleva overo n'omme onesto;
Miraglia 'mmiezz' a ttante era 'o cchiù sserio,
e ffuje nu ragg''e sole 'int''a tempesta.*

*E 'ncopp''e ccarte soje,gnosta e ssurore,
quanno s'ausava penna e calamaje;
cu''na passiona carrega d'ammore,
tanto facette ca 'o resuscitaje.*

*Ogge ca tanti ccose so' cagnate,
e ttanti ccose cagnarranno ancora;
nun se pò scancellà tutt''o ppassato,
nun se pò scarpesà chi ha dato 'o còre!*

4/7/1999 ANTONIO RUGGIERO

SO' ARRIVATE 'E PIEMONTESE

*So' arrivate 'e piemontese,
sì, però senza cavalle;
so' arrivate cu' ll' intesa,
'e cuntarce quatte palle.*

*Chelli ppalle ca 'na vòta,
fujeno sulo scard''e vrite,
scamazzanno sott''a rota
chella bbell' Italia aunita.*

*Chillu suonno 'e fratellanza,
nu miraggio, 'na chimèra,
ca rignette e rregn''a panza
a cchi azzuppa 'e che mmanèra.*

*So' arrivate 'e piemontese,
so' arrivate 'e bbella posta;
ciente, mille mane stese,
'ncopp' a cchesta Banca nosta.**

*E scusate si me 'ncrippò,
si ve dico 'a verità...
'O ttabbacco 'int' a 'na pippa,
sulo fummo nce pò ddà.*

*Sulo fummo, che squallore,
sott' a cchistu cielo blu;
cinche seculè 'e splennore...
E 'ntrasatto, niente cchiù.*

26/9/2000 ANTONIO RUGGIERO

**Banco di Napoli*